



## Terenga 3: Hōtaka 09 – Whakamihi/Mihi

Tēnei te reo karamihi ki a koutou te hunga e iri mārō nei te manawa ki te kai a te rangatira. Nau mai, tauti mai ki te papa o Ako. Ki konei whakamahiti ai i te korou ki te whakatairanga i te reo i ō tātou kāinga maha huri noa i ngā motu.

### Hei Mahi Whakarongo

Kia whakarongo tātou ki ngā mihi a te hunga i haere ki te whakamānawa i te ekenga o Jerry Matepārae ki te tūranga o te Kāwana Tianara o Aotearoa i te tau 2011. Anei ngā pātai hei whakautu mā koutou:

- 1) Nō whea ia?
- 2) Ka whia te roa ōna i roto i te tūranga?
- 3) He aha te tūranga?

### He Whakamārama

He nui ngā whakataukī e ārahi nei i a tātou kia kua e tupu te whakahīhi. Anei ētehi:

1. Kāore te kūmara e kōrero i tōna māngaro.
2. Waiho mā te tangata e mihi.
3. Ehara taku toa i te toa takitahi, engari he toa takitini.
4. Ehara au i te rangatira, engari he ata ahau nō te tangata.

Arā noa atu ngā kupu whakarite hei kiānga whakamihi. Anei ētehi:

*Kei te whītiki o te kī (he kaipupuru kōrero)*

*Kei te whakawhitinga o te rā (he tangata ātaahua)*

*Kei te manu taupua (he rangatira)*

*Kei te kāhu kōrako (he kaumātua e whakaritea nei ki te kāhu kaumātua, he mā ngā huruhuru)*

*Kei te toka tū moana (he tangata kaha ū ahakoa ngā whiunga o te wā)*

*Tēnā koe Hine-ngākau (he mihi ki te wahine whakaaro nui)*

*Tēnā koe e te manawa tītī/e te manawa piharau (he mihi ki te tangata ū ki te kaupapa, pēnei i te roa o te rere o te tītī me te kaha o te piharau ki te piri ki te tahataha o te awa.)*

### Hei Mahi

Whakaurua he kupu hei whakaoti i tēnei mihi:

Tēnā koe e \_\_\_\_\_, kei taku \_\_\_\_\_ mōu i \_\_\_\_\_.

Nāu i \_\_\_\_\_ ai \_\_\_\_\_. Nō reira \_\_\_\_\_.

#### He Whakautu:

Tēnā koe e te kāhu kōrako, kei taku kuru pounamu, mōu i tū hei poutokomanawa mō tōku whare. Nāu i pakari ai te tū a tēnei manu pīrere i tēnei ao. Nō reira ka nui ngā mihi o te ngākau ki a koe.